

四庫全書

集部

欽定四庫全書

榮陽外史集卷四十

明 鄭真 撰

題跋雜識

書盤峰先生墓表後

予讀元故侍講黃公著盤峰先生孫公墓表竊有感于
心宋至咸淳間權姦擅命強敵構兵剝床及膚之時也
先生以科第顯而弗得在尊位其為碩果之君子乎當

時縉紳之士號知先生者若王公龍澤對策以舍和吐
氣為說附會賈氏遂取上第逮仕北朝官為臺多出處
大致殆無足言方公虛谷上十可斬之說得領郡符不
旋踵降敵復領守事言與行違士論羞之與王公無以
過也留忠齋由狀元至宰輔不能出一言效一策以救
其危乃從瀛國入覲復取顯宦視先生有愧矣獨則堂
家公以清節著其不署降表首為文丞相所稱雖以祈
請使北終不受爵命居河間講易北方學者師尊之歸

歿臨安遺愛在民有不忘者於先生其志同道合者乎
先生與諸君子生相先後而同仕於朝運去物改其富
貴也非有攀附之榮淪落也不失久要之誼節義天下
大閑惟先生守之終其身是豈不足以扶世教敦薄俗
也耶侍講公論著其平生而表之墓隧寧有浮辭溢美
者乎子光王君侍講公高弟已而復以銘其弟求心翁一
門師友之言為天下後世取重孫氏伯仲文獻之傳其
不朽矣哉

跋彩煙楊氏族譜

予嘗習譜系學楊以邑姓周伯僑之裔號楊侯系本軒轅世家弘農漢太尉震其流派也自漢至宇文周庾祚久遠普六茹由隋公受禪楊氏遂為天族貴莫與比今越之綵煙者相傳為隋榮王之後蓋自三評事以下次第可譜凡十有三世夫萬物本乎天人本乎祖黃帝子孫有本有支分封別姓散滿天下傳數千百載以至於今日殆不偶然也彩煙之族知其祖之所自出始於

榮王庶幾木水本源之義矣後人嗣而承之足見世胄
神明之盛而其族之親疎遠近與其人之貴賤賢愚因
可考證豈非古者維持宗姓之法歟昔荆國王文公譜
臨川許氏天下後世誦其言而信之楊太史秉喆叙彩
煙族譜文雄事實無媿前烈士大夫樂道人家世者孰
不取證於是哉

跋番陽范氏宗譜

士大夫家敦睦之法莫重於立宗立宗莫先於叙譜譜

所以辨昭穆明長幼分遠近也世異事殊仁義詩書之
澤微忠信孝敬之道缺大家巨室有鐵壚步之譏家世
圖譜狼籍廢棄至於貴賤分殊親疎勢隔遇諸道塗如
不相識其有能追念本始而克盡其情者乎嗚呼古者
九宗五兩之法既已廢矣有能叙其得姓之由自源而
流由枝而葉以永一家之傳豈非先王遺意哉番陽范
氏系出高平家於蜀西始祖招在唐時為番陽守黃巢
之亂徙居樂平巖前招之子鑣為都大司官領衆攻巢

戰勝羅婆橋旋師屯巖前卒死之唐封為忠勇侯廟祀
不絕自唐歷宋以至于今日數百餘年以詩書守其世
祚寔忠勇之報也有某字仲暹者好學而文際今興運
以秀才徵入太平府闕縣簿陞平涼靜寧州莊浪縣丞
嘗著圖譜自番陽府君以下官閥世系歷歷可考范氏
子孫守而勿失雖千萬里而遠千百年之隔一有會合親
親之義將悠然而生矣其為敦睦之計何深且遠哉予
家四明先祖學錄公亦以范氏式齋從孫來繼式齋事

宋寧理兩朝累官至文華閣學士工部尚書贈少師與
番禺范氏皆本高平夫天子建德因生而賜姓姓不可
變也支流派演分而為二可不諗其祖考之所自出哉
孟仲季同出於魯向華同出於宋樂高同出於齊吾鄭
氏之出于范木水本源何可忘也予弟奇倅簿莊浪與
仲暹為同僚誼如兄弟况宗盟所自可不敦始終之好
哉

書昭仁寺碑後附歐陽公跋語

右昭仁寺碑在幽州唐太宗與薛舉戰處也唐
自起義與羣雄戰處後皆建佛寺為陣亡士薦
福湯武之敗桀紂殺人固亦多矣而商周享國
皆數百年其荷天之祐者以其心存大公為民
除害也唐之建寺外雖託為戰亡之士其實自
贖殺人之咎爾其撥亂開基有足壯者乃區區
於此不亦陋哉碑文朱子奢撰而不
著書人名氏字畫甚工此予所錄也

此歐陽公集古錄昭仁寺碑跋語也碑在幽州宜祿鎮
荒煙野草中拓工罕至碑傳于世者少予至正間居四明
與博古君止齋嘗論及之際聖運典教臨淮七年始得
于鄉友知咸陽縣事臧君九疇碑蓋朱子奢撰所書不著

人姓氏識者以為虞永興公按太宗朝以八法擅名者
歐虞褚薛四人而此碑勁正深穩信非永興公不能歐
公稱其字畫甚工而不質言其人亦闕其所疑爾公嘗
言陳隋之間字書極其精妙而自開皇仁壽至唐高宗
以前碑刻往往不著名氏豈此碑尚襲故態耶抑嘗特
牽于事勢不得已而書謙讓不欲以姓名傳世耶此豈
予所測識哉因裝潢為學書之一助云爾碑在幽州而
集古錄以為幽州蓋幽與幽相類必刊者之誤也

又

唐昭仁寺碑不署所書名氏以筆法觀之蕭瘦似褚遂良勁正似歐陽率更而謹重整密顧盼有情如端人碩士戎冠博帶規行矩步從容獻納于廟堂之上故文忠歐陽公愛而錄之而近世士大夫以為非永興公不能作也碑為陣亡士薦福建寺而作朱子奢之文類六朝俳儷體宏辭廣辯不可涯涘而委曲回護尤見筆力文忠所謂自贖殺人之咎者蓋在於此觀是碑者有以見

唐時異教之盛而先王之道日以湮微矣字畫之波磔云乎哉

又

唐太宗效虞世南書以為甚似至戠字難於落筆命世南補書帝以示魏徵徵曰此戈法似世南書也帝服其精鑒太宗天縱多能尤善書法然于世南書終不能彷彿也況其他者哉此碑八法絕類世南其用筆行鋒尤勝雖不著所書人名氏識者以為永興公殆無疑矣

跋李靖上西岳神書真蹟

予嘗閱武經七書於李相國衛公問對信其善于用兵
今觀衛公上西岳神書勇烈之氣強毅之詞誠可質之
明神然其末云斬大王頭焚其廟建縱橫之略不謂之
褻傲不可也夫其語明神者如此則其御士之嚴可知
矣此所以際遇太宗開拓疆土位兼將相圖形凌煙與
唐家相為無窮也嗚呼雄哉按華山為西岳衛公京兆
三原人西岳固其鄉也然石刻在今廣西藤縣不知何

如予友松江沈文舉云其下有宋人題誌可考今不可得矣

又

諸葛武侯事蜀漢三分天下身都將相與草廬初見先主論議始終不違其振古之豪傑哉李靖佐唐興運功名事業與武侯相望視其微時上西岳神書以英雄之略自許亦無一言相背者可與武侯之言並觀矣

跋桂陽周府君碑附歐陽集古錄後題

右漢桂陽周府君碑按韶州圖經云後漢桂陽太守周府君碑廟在樂昌縣西一百一十八里武溪上武溪驚湍激石流數百里昔馬援南征其門人爰寄生善吹笛援為作歌和之名曰武溪深其辭曰滔滔武溪一何深鳥飛不渡獸不敢臨嗟哉武溪多毒淫周使君開此溪下合真水桂陽人便之為立廟刻石又云碑在廟中郭蒼文今碑文磨滅云府君字君光而名已訛缺不可辨圖經但云周使君亦不著其名後漢書又無傳遂不知為

何人也按武水源出柳州臨武縣鷓鴣南流三百里入桂陽而桂水真水盧溪曹溪諸水皆與武水合流其俗謂水湍峻為瀧韓退之詩云南下昌樂瀧即此水也碑首題云神漢者如唐人云聖唐爾蓋當時已為此語而史傳他書無之獨見于此碑也

漢人隸法在東南予所見者校官碑與此桂陽太守周府君紀功銘爾筆法高古尤可寶玩而磨滅不可讀歐公集古錄論著凡兩見其一錄如右其言此君

檢漢書無之今碑石缺不見其名惜乎遂不見於世也南人紀其所修瀧水即韓文公所謂昌樂瀧者是也至今以為利祠宇甚嚴云夫興利除害長民者所宜用心也周府君瀧水之績賴此碑垂諸不朽然則文章金石之傳何可廢耶按周君字君光下邳人下邳今為鳳陽屬州予預修郡史時于人物傳不得紀載信乎學不博而文之缺也碑在今韶州府治鄉友烏先生繼善用以為貺且問曰碑首稱神漢者何予

曰猶聖朝稱聖明爾繼善曰然及閱歐公集古錄所云亦不出此有以見義理古今所同然也

跋魏大饗碑

魏大饗碑在今鳳陽潁州亳縣蓋魏太祖饗軍之地也世傳鍾繇所書筆法高古信繇作無疑三國鼎沸蜀先主以宗室之胄志興漢室子朱子通鑑綱目大書昭烈皇帝系以漢統後之作史者莫敢異議有以見天理人心所在矣今觀此碑目蜀吳為因為虜豈不夸且誣哉

然其甲兵之盛物品之豐饗賚之厚亦足以見武功之成矣

跋玄秘銘

唐大達法師玄秘塔銘柳公權書筆法剛勁嚴整八法具存如正人端士莪芻正笏特立廷陛而不可屈撓殆與顏太師同出一軌唐穆宗嘗問公權書何由善公權對以心正則筆正穆宗悟其筆諫今觀此碑則其中之所存可想見矣

跋汝帖

此係汝州刻本記以汝州之印自皇顓至五代帝王名臣篆隸真草凡九十餘種其法隨時而變然則人文之作其有關於氣運然耶石在今汝州儒學文理粗疏拓工有事則其聲琤然如協律呂亦其異也

跋顏魯公多寶塔銘

歐陽文忠公謂顏魯公書如忠臣烈士道德君子端嚴尊重人初見而畏之然愈久而愈可愛也今觀魯公所

書多寶塔碑文忠之言信矣夫浮屠之學聖門所不道
楚金法師感應之事涉於虛幻其紀載乃托魯公書遂
傳後世其亦有緣耶攜李沈君茂玄官鳳陽教其子學
魯公書予以此碑贈之茂玄於魯公不特慕其書寔慕
其為人也

跋唐晉帖

王右軍筆陣圖與懷素聖女律公藏真帖裝成一帙右
軍筆法固可尚已其云張旭乃唐時人不知何謂豈別

有其人即懷素落筆飛動之勢尤為書法之傑異教之士技成業精乃千載傳之况儒者學聖人之道者乎書為六藝之一聖門所取學者誠不可不留意也

跋裴行儉帖

唐太原郡王魯國太夫人楊氏墓誌銘裴行儉書在今縣以修唐時園陵得諸土中蓋當時陪葬故也書法類歐陽率更而森嚴整密尤為可法惜塵土久蝕至不可讀然摩挲拂拭亦可得其波磔因裂為三十餘葉裝潢

成帙而不復次第其文云

跋曹娥碑

此吉安新刻本也蕭散道勁漢魏之風度可見矣夫娥之孝通天地與江流相為無窮淳于之文足以發之鍾繇所書筆力寔與之稱斯文萬世名教之傳豈不偉哉當塗公與娥同姓其逆節媿於娥矣而色絲幼婦區區校智於三十里間至於妬賢殺人其不可憾也夫

跋化度寺碑

右歐陽率更所書化度寺碑在今平涼府華亭縣近有董縣丞者得諸蕭寺塔中留置私室後移諸縣治遂傳之人間筆法蒼古老健視清微婉媚者優劣不同陝右歐書當以為最臨學之家可槩見也

客有自陝來者言碑為人竊載又軍士爭奪用丁斧鑿而碎之惜夫然則雷轟薦福果命也哉

跋虞恭公碑

虞恭公碑歐陽率更所書其文剝落不完土蝕其半書

法高古杜少陵所謂瘦硬通神者殆此類也耶彼柔婉
妍媚如婦人女子情狀其亦末矣碑定為古刻在今陝
右醴泉縣

跋魏受禪碑

魏受禪碑歐陽文忠公論漢魏紀月日之差以碑為正
所署勸進名氏自臣歆以下皆漢廷名臣受國厚恩者
也其屈身辱節一至此哉夫唐虞公天下三代家天下
可公也故其賢當讓可家也故其世可延其致一而已

魏武欺孤寡孤媚以取天下然徘徊隱忍終其身弗遂
豈其心猶有慊於公議耶迨及其子丕偃然為之漢廷
之臣且引舜禹禪受之事以為口實獨何心哉此篡逆
之禍所以接迹於後世也文忠著五代史有雜臣唐十
臣傳之目臣者不二其心者也臣而至於雜亦可憐已
若臣歆等其非雜臣之流哉

跋魏上尊號碑

古之隆號極稱曰皇曰帝曰王皆以明尊無二上之義

至秦始皇兼皇帝而稱之後世因之當塗之篡漢傳載其事至為明白而此碑請上為號首以舜禹為言夫堯之授舜舜之授禹蓋以公天下為心舜之事堯禹之事舜猶君父也魏之于山陽公其如舜禹矣乎歐公謂讀其書者可為流涕而大書深刻乃欲為千古之傳其亦可為慨然矣

跋玉枕蘭亭

此玉枕蘭亭唐人臨本係臨江新刻晉人之風度居然

可見世傳蘭亭在辨才處唐太宗令蕭翼以百計得之而近代高公似孫胡公石塘咸辨其誣然自昭陵既出定武石刻為世所重宋理宗周漢公主下嫁以為第四奩後趙子固得之嘗中流失船諸物不問獨喜蘭亭無恙古人之寶法書者如是若此刻者可不愛重矣哉

跋索靖月儀石刻

漢黃門史游作急就篇解散隸體謂之章草今世所傳者吳皇象所書索靖月儀實本急就章然急就古重典

質拘翦不失隸體月儀則變化曲折晉人之風度見矣
其稱君白不知所謂鄉友烏先生繼善為予言此月儀
書式未及施用故不稱名氏而稱君猶今言某甲某乙
爾未敢以為必然錄之以誌傳疑之義石刻在臨江天
寧寺烏先生所貽云

跋智永真草千文

晉人書法至隋唐變矣智永禪師獨以王氏之裔不失
其正所書真草千文道勁婉媚實具晉法歐陽公嘗以

其中筆法有不類者疑為後人補足輒去其偽者不以文不足為嫌也蓋其識鑒之精如此今世所盛傳者陝西刻本學書者視為筌蹄世傳梁武帝時以王羲之所書有海鹹河淡之類故歐公以為不獨始于羲之恐羲之增益而興嗣遂得衍而成文爾濠梁沈生在新得此本裝潢成帙請予識其後

題篆書偏旁

篆書以偏旁為正偏旁不正豈學古之士哉許慎之於

說文戴侗之於六書故以偏旁猶深意焉夢英方外之士垂意斯文其書偏旁字源自以為繼李陽冰之美郭忠恕謂可萬古教人信知言哉予友鄱陽周克復字學得其父雪坡翁之傳嘗言吾篆用蠡匾法姚江趙撝謙以為未至藝學之士自負所見各有不同安得如夢英忠恕者論定其是非之歸哉石刻在今西安府學其稱咸平二年建則宋定陵即位初也

題西岳華山碑

西岳華山碑弘農郡書佐郭香書宋洪适云東漢循王
莽之禁人無二名碑稱郭香察書者察涖他人之書爾
隸法與文章同一高古惜撰述不知為何人也夫巡狩
方岳柴望祭告三代以上則然漢興詔有司以時祠祭
武帝定為宮殿之制後雖興仆不常而終莫之廢所謂
國家禮亦宜之者也當時二千石若袁府君周陽恭肅
明神孫府君山陵欽若功業皆足以垂諸不朽後是者
亦牽聯得書何其幸哉碑云元熹四年八年蓋桓帝紀

年之次魏太和宋元豐間有題名歲月若唐李德裕亦系名其上云

書金蘭帖後

右五言詩及後語定為歐陽率更行書世取詩中二字名金蘭帖詞與字稱而筆力意態實有二王遺意蓋其正書有法縱情所至無往不得其妙者如此惜其詩不知所貽為何人亦不見其自署姓氏矣博陵崔氏克廣其傳豈非用意斯文者哉

書道經後

黃帝陰符經汝南袁正己書生天得道經及消災護命
常清靜二經則姚平龐仁顯書俱得歐陽筆意若仁顯
則抵掌孫叔敖矣虞文靖公謂宋初自蔡君謨猶有前
代遺意晚宋學歐陽者纖弱僅如編簞亦氣運使然仁顯
當宋盛時氣完力壯庶幾逼真使歐陽見之寧不謂其
得心畫之傳哉

書范府君墓銘後

始真容臨淮為范府君著墓銘其子與權裝潢成軸持
入京師縉紳士大夫追挽之後數年與權由春官掾出
宰靈壽三年考滿入覲奉命復任過臨淮寓舍出以相
示真伏而讀之詞意悽愴若欲起夫幽沈閨寂而不可
得者何其忠厚之至哉孝子揚父之美與權為庶幾矣
夫積善之報不在其身則在其子孫與權以才行貴為
七品法當請贈異日金花紫誥恩及泉壤精爽欽承山
林改觀而真以宗家子弟當有大書不一書者矣與權


者特刻是銘山中用志於後

跋宋高宗御墨為吳道延作

古稱聖人載黃屋佩玉璽以為纓紱其心今觀思陵書
賜近臣至忠詩四章在萬乘之尊而悅山林深遠之趣
所謂黃屋非心者也其將遜位儲嗣退居德壽宮時耶
書法本智永禪師而出入二王善鑒者以其克萃衆美
云

錄石壇龍祠石刻後

右龍王誥詞缺文及呂招撫跋語錄之石刻上及以宋史考定得其大略如此初預修郡史蒐訪古蹟廟東民家某氏年九十餘龐眉皓首言故宋封誥多藏其家兵亂攜石載以出事急棄道上今不復矣車駕歸幸嘗面奏其事云



滎陽外史集卷四十

欽定四庫全書

集部

榮陽外史集卷四十一至五

詳校官編修臣程槐

中書臣劉源溥覆勘

總校官降調編修臣倉聖脉

校對官編修臣張燾

謄錄監生臣吳岐山

欽定四庫全書

滎陽外史集卷四十一

事實

史氏先生事實

史以官為氏其先高陽氏之裔名黎者為火正與重氏
典司天地弟吳回克紹其職歷夏商世守之周太史佚
其後也子孫散在列國魯有克衛有魚有朝及朝之狗

明鄭真撰

皆以才顯漢魯國史恭子三人高曾玄高官大司馬樂陵侯二子衍丹丹為左將軍武陽侯孫均均子崇自杜陵受封漂陽侯遂為郡人崇裔孫宋樂鄉令瓌瓌七世孫務滋相唐武后生清河令惟肖是為宣城史氏又丹裔孫後漢歸義侯苞晉永嘉亂避地江左是為建康史氏以至高容京兆史氏皆本丹後而京兆有隨太平公萬歲若陳留考城史氏則漢京兆敞之後其散在傳記功業可考者若後漢漢陽太守充南涼祠部郎中曷唐節

度使憲誠及其子檢校工部尚書孝章皆文武之秀傑
云宋在東都時鄆史氏始著其源實出於京兆有名惟
則者是為始祖府君娶余氏生二子長某次成成娶陳
氏繼任氏成後以魯孫才事高宗拜簽書樞密院事得
贈太子少保陳氏贈南昌郡夫人任氏贈咸寧郡夫人
即所謂五祖者也少保生二子長某次簡次翰簡亦以
才貴贈太子少傅暨曾孫忠定越王浩相孝宗累贈太
師追越國公初忠定之入相也孝宗詔賜家廟祀及五

世暨罷政東歸慨念始祖至高祖少保及其配兩世五人俱無坟墓春秋汎掃哀寓無所乃卜地于東湖下水之原窆為五穴具衣冠葬焉仍植楹其上自著招魂文勒之貞石質淳熙戊申之四月四日也自忠定王至今乃二百餘年水砂龍穴之秀儼如一日王之四世孫公襲每過其處為之慨然不鄙謂某托媿史氏俾追述其事求當世立言者為銘碑以傳不朽某惟孝子慈孫之于其先苟可以用情者將無所不至以衣冠為飾躬之

具士君子平日所御其所以有威有儀者寔在於是空
而藏之不必其體魄之存而其神明固有所憑藉而永
安矣冥漠之間出游以時氣類之感乎不有以如見其
咲貌如聞其音聲者乎其嘗讀王所著擬招詞意高古
實可與宋玉景差相上下而其功德疏文有曰道骨既
銷於黃壤仙游已在于青霄伏覲光明下昭窟宅潛德
九原而可作遺芳萬祀以長存則其惻怛悲惋勤拳懇
到之情何如耶故其慶澤所鍾世相王封為當時東南

之冠想夫來祭之時雲仍後先緋紫輝映薦盥興俯規
應而矩隨肩齊而踵接俎豆之馨庖烹之熟格享碩歆
錫茲祖福不亦盛矣乎哉世異事殊俛仰今昔然而聚
族數千百指猶有以經術致科名產業植門戶者其世
澤可謂深達而無窮矣矧如公襲力學篤行文獻所存
有足徵者而其追遠崇先復有以心忠定越王之用心
者乎詩曰無念爾祖聿修厥德又曰以引以續續古之
人於公襲見之矣仁人君子其必有動心者哉謹序其

世系如右其五祖行實及生歿歲月不槩見茲弗錄

先妣蔣氏安人事實

先妣姓蔣氏諱某字

闕

蔣氏世居淮之光州固始縣

有諱光者徙居毗陵後復以董昌亂徙鄞因家焉先生宗霸號磨訶居士宗霸生侃侃生浚明在宋時贈金紫光祿大夫浚明次子璿與其弟琬師事陳忠肅公瓘相

繼登紹聖

闕

崇寧五年丙戌進士第忠肅扁其

堂曰連桂璿贈中大夫琬贈宣奉大夫于先妣為六世

祖琬生台州通判贈中奉大夫梗梗生南昌府通判贈
太中大夫如愚于先妣為高祖如愚生峴中慶元二年
丙辰第歷侍御史諫議大夫刑部尚書以寶章閣學士
奉玉隆宮致仕官正奉大夫于先妣為曾伯祖此蔣氏
官閥之可見者也曾祖璚祖遜父善孫自號處士母趙
氏宋宗室秦王伯升與術之後先妣處士幼女在弱齡
時處士特所鍾愛先人處州教授諱覺民字以道方弱
冠以文行有聲于處士有舅甥之誼論辨往復情孚意

合遂以先妣來歸先祖妣蔣氏以得兄女為婦深加愛
喜先祖妣患昧目先教授日候寢興舐之以舌始得見
明先妣躬左右不少懈祖妣既亡先祖考慶元學錄公
芳叔復以老病寢卧累年先教授亦患疾而劇先妣左
周右旋而於學錄公湯藥飲食奉事益謹學錄公嘗謂
之曰新婦孝敬異日當使有子若孫以祚吾門學錄公
即世先教授服喪三年既闋家居雖簞瓢屢空而以道
自任澹然無營大家貴室往往修書致幣為其弟子傳

經授業去之旁近邑米鹽細故先妣躬親之歲時祭祀齋宿治具而于宗姻親黨備盡款洽之禮先姑適趙氏病風累年問候不怠其死也出首飾治棺衾冒雨送殯姑之子維亡殮具復如其母迨姑女之嫁尤盡心焉先外祖處士年六十九而終惟外祖母及先妣所生母陳在而歸寧以時慎終如始自是而後男婚女嫁儉薄隨宜既已畢事將優游歲月以成壽考之慶矣不幸先教授即世先妣憂病危殆數四既愈起治家事葬祭之具

悉臨泣之且從諸子所請歲時躬上塚以致哀思因欲
結廬其旁以圖就終而以無資弗及遂意俄一日大風
慘慄天色冥晦晨起盥櫛飲食如平常至午不病而卒
年六十有九先妣生于有元大德五年辛丑六月二十
六日卒于大明洪武三年十月十九日以明年之十月
初五日祔葬于鄞縣西崑山先教授之北子男三駒今
為金華府義烏縣儒學教諭真澍江鄉貢進士鳳陽府
臨淮縣儒學教諭鳳平涼府靜寧州莊浪縣主簿女二

長適同郡劉濬次適天台葉亮侍夫蘭亭為山長死節
義孫男五翁昇同昇東昇允昇復昇女三初先教授將
葬啟殯及塗而雨執紼者衣為盡濕先妣泣言曰古者
雨不克葬者為其無備也故在廟未發之時得為雨止
今既在路矣如之何吾異日獲從夫子及期而雨其必
少止矣乎至是先妣之葬天日澄霽送者縞素哭泣而
去皆以先妣夙願所致云惟四明文獻望族莫久于蔣
氏先外祖處士踐修世好以先妣歸我先教授公當貧

賤患難之時得左右維持之助婦道母儀為儒門賢耦
駒等不肖奉遺教之萬一托名士列而困窶不振莫致
怡愉之養不孝之罪日累歲積昊天不弔先教授奄棄
諸孤而先妣亦相隨地下嗚呼痛哉先教授行業執友
王先生叔載既為之狀前翰林承旨臨川危公取以誌
墓而先妣內範未有傳之者謹致其平生大略及生歿
歲月求當代立言君子載之貞石以傳不朽云

行狀

故葉君行狀

君諱聖翁字賢仲葉氏出自羊姓沈諸梁子高食采于

葉謂之葉公因以為氏

葉音攝今呼為枝葉之葉蓋聲音變也

子孫散居

譜牒莫考其在台之寧海者世為大族有名夢鼎者仕

宋官至右僕射君之先相傳自台徙明其居慈溪有名

其者為著作郎于君支為近曾祖崇昌祖士龍父福孫

祖不娶無子而君之父實以從子來繼皆隱德不仕君幼

而岐嶷長而魁偉端重人見而敬之徙鄉先生桂

闕游

經史輒能成誦為詩文發於本實風形月狀皆所不道
云君孝友天出父早卒君未弱冠即能自力疏布飭粥
哭泣無時暨葬廬墓三年見虎不為動母劉氏嘗病不
解衣帶奉匱抱就之構為精廬以祈福問安調膳終身
如一日與其兄道翁弟闕翁同居共業勤儉齊一凡可
以大其先者力為之家漸饒厚鄉保正里胥推君為首
君事上奉公旦夕維謹縣令簿待以客禮時兩稅之法
為急係官田民久荒業者君代輸恐後歲饑或輕糴或

作廡以賑恤之所居面小江無擇浦以張孝子得名有
橋潮汐衝擊而圯君傾已資以復舊觀其道路之泥淖
者補以石行者便之建別室為斂藏所暇則與賓客載
觴豆其中劇談古今行事之迹人莫窺其際好書史圖
畫有售者輒不吝于名公巨卿文章關世教者手抄成
卷帙嘗曰葉氏詩禮之澤累世矣吾懼其中絕焉乃書
遺誡數百言將建屋置田延師以教合族而君以疽發
頂卒其子承祖等以母命卒成之人至今稱焉君生于

某年某月某日卒于至正某年六月十日年四十有七
以某年某月某日葬于里黃輿之原娶章氏君從母女
也世居鄞城高城姆教貞淑年二十始歸于君相敬有
禮婦道克備君既先卒慟哭幾絕除喪薰澤不御尋常
間念及輒悲咽流涕朔望修齋事于墓下姑年八十餘
朝夕奉養愈謹比作佛老事以寓追悼姻戚上下雍睦
相尚舉無間言時諸孤長者年十九餘皆幼延師教育
曲盡禮意賓客至則俾之具酒殽秉燈火執弟子職以

求誨益年既長矣乃出君遺誠手澤示之曰此而父未
終之志也吾嘗夙夜于懷其可不使若等繼為之耶諸
子泣拜奉承惟謹于是一門絃誦之聲藹然在耳他如
室居土木之工婚娶嫁送之事亦畧備厥婦及孫少長侍
列奉盃為壽則自慰曰吾庶幾不負君子于地下矣尤
好善樂施隣有窮乏無告者多為之資助里有下湖廟
嘗祈禱輒應為修其祠宇作夾山亭延方外士煮茗以
飲往來者娶居十有六年扶持植立辛苦百端而鼎養

弗終人子之痛寧有已耶生於某年某月某日卒於至
正某年四月十三日年五十有九以某年某月某日祔
葬于君之域子男五承祖敬祖建祖慈溪縣儒學教諭
立祖弘祖女一適台州路推官金侯章之子麟孫男八
如珪如璋如瑾如林如松如闕如栢如闕女四君德性
溫恭不為表襮遇事坦然常有餘裕長裾博帶恂恂焉
古人君子幸生太平無虞之時不事建功立名而修已
行誼惟恐弗及故閨門守貞信之節而子姓敦禮讓之

教則君遺德之及有不可泯者豈非其賢乎哉某始與君為文字交承君慰藉良厚及君既歿承祖等篤叙世契且致母氏之言以禮致諸義塾為教導稱首以是知君為詳乃叙其世裔行業生歿歲月大槩求當世有道之士銘焉謹狀

故山西賈克夫行狀

克夫姓賈氏諱從仁賈氏系出晉大夫季之後世家山西太原忻州定襄縣南寇庄曾祖文玠妣某氏祖和妣

何氏父幹妣劉氏自幹以下五世同居共爨七百餘指
庭無間言克夫生而端重質直不拘細行精律學筆翰
如流尤長於筭數刑名年三十餘推擇為吏歷石臺二
州及冀寧大同兩府處事必法度交際必以誠實或謂
之曰今之奉公者鮮勿以虛誕自詭吾子平日言未嘗
偽其異于人哉克夫笑曰為吏患無才敗廼事一有虛
誑其間是賊其心也吾豈忍為之耶士大夫咸稱之曰
若克夫者其諺所謂有吏才而無吏心者乎檄書上考

授保德州河曲縣典史以廉勤稱冀寧府長鑒衡公平
不妄許可克夫造府白事獎厲再三僚友必使預席有
訝之者府長曰使吾府幕得此人何慮哉固當以賓禮
待之其見重如此秩滿慨然曰吾豈以簿書為形役也
即幸生天下太平而志不及展吾其從此逝矣拂衣

闕

江東湖南憲府入刑部為令史
纓自曹監出為全寧路教授皆能以功業自見克夫夙
至京訓迪成就之居處不見形迹雖隣友不知為叔姪

也述先訓作誠拳拳以修身齊家為言禁止私藏及奢
侈費耗專制獨成之事凡三百餘言一日得疾將屬纊
呼其次子統曰爾兄不幸早世爾年尚幼讀書為善士
可保先業急情逸豫則棄人耳勉之哉克夫生于元至
元十八年庚辰三月初四日卒于至正十年庚寅十月
初十日享年七十有一以是月十有五日葬于庄西祖
塋之次原娶張氏繼郭氏羅氏子男三長繼張出少有
逸才年二十充貢先卒次統郭出博學能文次維羅出

女二劉某霍某其婿也孫男女一其一造侯在廷克夫
清苦儉約不嗜飲酒為吏二十年未嘗以罪累大意以
為官之與民上下相維為政者使兩無虧損斯庶幾矣
倘未得已寧虧官可損民耶處心利物多此類其居家
也婚姻祭祀賓客之禮皆有品節而以敬為本治喪不
用浮屠孟州倅韓某將上官道死克夫棺斂返葬之又
資嫁其女經紀家事嘗言吾早失所怙誤人為吏後輩
毋效吾為也吾家積善累世天復祚吾門出一讀書人

足矣於是從子純之子守正緒之子守一或受業上庠或出就外傳守一以易經膺河東鄉貢進士薦由霍州儒學正官工部司稻至正戊戌守正與弟守質侍其父避亂蒙山寇至欲殺純守正拜且泣曰吾父老且病願以身代即欲殺守質守正曰吾老不能備養旨甘之事實賴吾弟何不殺我寇曰吾殺人多矣寧見此子義者耶遂兩釋之且問其所生年曰是吾兄也留所掠驢二再拜而去會稽葉砥作傳以實其事人以爲克夫家教

之及也大明洪武元年忻州內附版圖入職方氏朝廷
徵用儒士布列中外克夫次子統以按察僉司郭公桓
薦詣闕下拜監察御史旨來中都真以諸生禮見語及
先世慨念不忘君子以是知克夫有子矣夫賢者之報
不在其身則在其子孫以克夫才行足以見諸設施而
以心處靖退故弗克享有祿仕當時君子蓋深期之而
勿果于所期也年逾耄耄從容歸全委慶諸社至其後
人嬰患難則有以成節義之名際文明則有以被恩光

之盛殆所謂沒世而不可忘者耶夫德厚者流光本大者末茂定襄邊鄙用兵之餘向之同里閭者十無八九而賈氏屹然其間廼今御史發迹仕途上承天子耳目之寄推本教忠增封泉壤當有大書不一書者是用狀其生歿歲月大略求當世立言君子勒之名詩以傳不朽云

滎陽外史集卷四十一

欽定四庫全書

滎陽外史集卷四十二

明 鄭真 撰

行狀

四明孫先生行狀

先生姓孫氏諱元蒙字正甫孫氏系出河朔名全照者
有功澶州其仲子某當補牙校以讓其季南遊吳越遂
為明之鄞人曾祖諱願質宋朝散大夫國子司業工部

侍郎祖諱璠宗通直郎知臨海縣父諱嗣明宗將仕郎
曾祖妣黃氏祖妣莊氏妣周氏先生生而靜重寡默自
幼穎悟有志于學歲在戊申先生年十有八遭家多艱
父母連喪與其長兄元厚次兄元佐拮据喪事哀踊如
禮既葬服闋潛心經史家事一不經意值國家新學校
法有司選故家俊秀補郡庠弟子員先生樞衣以往適
鄉先生魯公月卿杜公孟傳皆以老成重望訓導太學
一見問其家牒以先世同官于朝有通家之契喜而謂

之曰文獻之真傳其惟有人乎蓋先生之四世祖技與
其子起予同登宋嘉定七年進士第以迪功郎監潭州
南岳廟累贈朝散大夫嘗師事宣獻樓公鑰端憲沈公
煥正獻袁公燮及見徽國文公證其所受學正文粹薈
為儒宗所著海上縈人多傳誦先生既得諸家學之懿
又有魯杜二先生以為依歸且以東南詩學莫萃于明
魯先生既得其源委于是先生請授詩經諸家之說旁
通曲暢學遂以成胡松石奉禮幣招致為師館穀之禮

十年如一日郡庠延聘為訓導從者雲集逾年以一言不合拂衣去太守丁公某與教授張導道留之不能得陵陽牟公應復景陽都司宣閩屈諸賓席俾二子執弟子禮且請攝教鄞學而兼其廩祿先生力辭不能葉先生恒敬常以國學生釋褐為餘姚倅奉書走百里延居館下州守劉公某文大同知宇文先生公諒子貞咸致敬禮遣子就學四明自宋紹興以來有鄉飲酒禮先生以其禮行之姚庠揖讓進退衣冠文物彬彬焉宋童杜

州先生得楊文元公慈湖之傳其孫子舟請于朝創書
院奉其祠事司教者自黃彥實以後難其人先生以童
氏致請之勤勉就東歸申明朱子教條季考月試具有
成式朔望讀呂氏鄉約書善記過以示勸懲遠近裹糧
而至者凡數十人太守埜堂阿殷圖公聞先生名復以
訓導屈致郡學當時與同其事者若先教授鄭先生以
道蔣先生景武伯威桂先生德稱彥良協力作興士習
為變廣平董公搏霄孟起僉帥浙東于先生雅愛重至

欽定四庫全書

卷四十二

正八年河南兵起公以復剡省功陞參知政事駐師三
關辟先生為餘杭縣儒學教諭或謂先生宜謝不往先
生曰董公吾知己也況教職為斯文世教所關者耶既
至公為欣喜慰藉傾蓋如平時時兵甲之餘舊染汚俗
誦絃絕響先生延請師儒講明忠孝聞者興起殿廷齋
廡煥然一新監郡字顏公繼總制三關平章左答納失
禮公駐劄餘杭尤相禮遇訪以世務先生條畫以對皆
中事情二公雖躉之而不及於用有以見先生經濟之

學蘊蓄之素如此在任二考調松府清忠書院山長於是先生已老矣喟然嘆曰吾何復仕哉得為晚節完人斯可矣歸隱于家為就終計然當時名公巨卿四方士大夫學者咸以先生鄉之耆碩典故因革就而取證焉先生高下隨時不矯不屈各得其所欲大明洪武六年朝廷以六科取士有司以先生仲子章應詔先生語之曰吾就木不遠賴汝等扶掖以盡餘日今與汝訣吾念汝從政未之能也以吾老故得以告還幸矣脫不汝聽

其以清白勿墮家聲哉因嗚咽不自勝逾二年得未疾
日猶夙興盥櫛有來問謁者必冠帶以見舉手謝焉屬
續前一日始就枕席不食飲次日四鼓怡然而逝神色
不變生于元至元二十八年辛卯十月二十六日卒于
大明洪武八年乙卯五月二十二日享年八十有五娶
莊氏沈靜寡默不事華飾年二十有七來歸治家勤儉
先生之得安于教育者其力也生有元至元二十九年
壬辰六月六日卒于至正二十五年丙午十月三十日

享年七十五葬以至正二十七年丁未十月十七日子
男三長弘次章河南府永城縣稅課局副使次傳女一
人適同郡金華府義烏縣儒學教諭鄭駒孫男六人復
生端生震生謙生道生陽生孫女四人長適同里楊啓
明餘幼在室弘等以明年又九月初三日奉柩葬于鄆
縣豐樂鄉黃山之原與莊氏合兆蓋先生所自辨定云
先生姿稟純粹紺顏白髮起居視聽康寧不衰而沖淡
夷坦得諸內養始終不為勢利聲色所惑待人接物和

氣可掬酒殽享具豐約隨宜而久交愈敬信不渝有善極口稱揚有惡未嘗出諸口恐不為人所齒天性孝友歲時昭穆祀享思慕終其身不牽于鬼神巫祝幼子傳嘗病巫有勸禱於祖禰者先生曰禱之誠是也然祖宗豈不欲嗣續之盛耶且壽夭有定瀆祀徼福非時與禮奚可哉傳竟得差人咸歎服先世產業以讓二兄一無所預已鬻質而用資復還者亦不為已僦居城中從容自給不以貧窶為戚二兄年幾八十常延致于家委曲

承順竭力周濟不為各疾病躬調藥餌憂形于色愈則
觴咏務盡其歡比其歿尤盡殯送之禮其篤于倫理若
此平生書無不讀至老勿倦而以性命道德為根柢文
章出入今古嘗兩造淞闡不售遂不復踐場屋盡出以
傳學者且曰聖賢之學知行體用盡之在已而已爵祿
有命焉誨諭諄切不以富貴貧賤禮意厚薄為輕重情
急不振者深加責讓不假詞色故從游多底成立以科
第登顯途任州縣者前後五六人所著序記碑銘贊頌

書疏題識詩歌曲重溫厚成一家言縉紳君子若柳公
貫道傳黃公潛晉卿危公素太朴咸相推羨浙東僉憲
史公銓季衡亦以先生可登館閣草剡以薦而勿果早
號映雪子有映雪齋藁若干卷藏于家其亡也呼其子
弘等戒之曰吾家自河朔府君以來歷十二世幾四百
年詩禮相承吾幸嗣遺緒今死矣引而勿替實在爾等
勉之哉先世著述吾祖知縣欲刻以傳在官每以自隨
以臨海兵難同歿焉殘編斷簡之僅存者吾欲繼志勿

及竟汝其勉為之茲固先澤所係也嗚呼先生于死生之際可謂克致其重者矣惟吾四明自宋以來衣冠之家棟宇相望百餘年來胤祚凋落文學節行求如先生者幾何人哉若稽郡史慶歷諸老模範後進淳熙大儒闡明正學仰止高山永言前烈先生老成聞望師表一鄉碩果不食官止於儒而身居兩朝年逾八秩深衣大帶歸然如魯之靈光庶幾于儒先君子哉真慨念先處州教授在時與先生齊名兄駒又為先生子壻累世親

契過從周旋而久客中都忽焉聞訃斂不及憑棺窆不
得臨穴負媿九原矣然念卅角以來號知先生乃為泣
哭弔序其出處及生歿歲月大槩求當世立言之士銘
其墓使後世君子知斯世而有斯人焉謹狀洪武九年
十一月初二日南至鄉貢進士同郡眷生鄭真狀

王先生叔遠行狀

先生諱寧孫字叔遠姓王氏王為瑯琊著姓後徙居開
封祥符宋保信軍承宣使安道公四世祖也靖康末金

人入汴公以兵扈從南渡遂定居鄞曾祖撫文學治政
為時名臣官至禮部郎中崇政殿說書祖應麟中寶祐
博學宏詞科歷事三朝掌兩制者十餘年高文典冊當世
傳誦官至吏部尚書翰林學士號厚齋先生父昌世承
務即世稱為承奉公故侍講金華黃文憲公銘其墓母
楊氏先生幼岐嶷侍承奉公側循導規矩出就外傳庠
校諸老若趙公山心石公仲剛咸獎厲治詩經得優柔
溫厚之風繼以春秋帝王經世要典取左氏公穀氏胡

文定氏張氏主一陳氏止齋呂氏朴卿及鄉先達若息齋高氏存畊趙氏時叔陳氏晝夜復習訂正同異史傳有未得其要者必推明事實極其始終而止讀范曄後漢書欲為註釋勿果為文敦尚本實然不肯拘有司繩墨未嘗一造場屋崔植傳浮嘗就焉二人者後亦為名士夫郡守知其賢以幣招致郡學訓導弟子員郡大家邵氏梅氏嘗屈諸家塾不久輒棄去西游淞江以所業贅丞相府丞相以其先賢子孫將署為白鹿書院山長

辭疾東歸人遂稱為山長先生云同舉山去鄞縣東四十餘里山高水深自承宣公下至承奉公皆葬其地先生構廬其中時致其思先世手澤宸章御墨寶藏珍惜凜如不勝尚書公所著深寧集等書累千百卷先生與其兄厚孫遂初公同為校讐明分目別肄習成誦其玉海及他書十二種請於部使者鋟梓以傳天下學者讀其書者以王氏世有人焉郡有鄉飲酒禮先生每歲周旋其間升降揖讓具中儀式太守禮敬之值世事日非

養恬肥遯中更脚氣疾常不出戶限而遇事輒慷慨直言至正末掣東憲僉戴公東臯按治于明民頗安之分省參政杭州巴哈掣東僉帥多爾濟不使其所為時御史廉呼嚕岱將由海道入京嗾其以它事誣搆戴罪繫諸府治父老民庶寓士論行臺訴寃及上書者相繼未報先生慨然曰此非吾所當言耶率明士大夫抗疏臺端戴得復職會多爾濟自海道遄師踰城以入變在不測戴帥郡將討之事定將薦剡先生謝絕之于是先生

年已艾矣將卒以家事屬其兄請異日葬同兆域且命以啖趙春秋殉生于有元大德十年某月某日卒于至正二十四年某月某日年五十有八以是年某月某日葬于同懇先塋之左嘗娶楊氏無子以兄子隲為後孫男一公權女一先生天資穎悟書無不讀而性理文章之懿制度典故之詳深致意焉其文章根柢班馬出入韓柳歐曾詩文未嘗留滯惜乎散亡者多性尤孝慈承奉公謝世已久事母楊氏克致其謹楊氏深愛之僕隸

養之如子至為構廬娶婦割膏壤以給之早與董先生
東葵蔣先生敬之為友二先生已物故獨兄事先君子
求我先生敦始終之誼酒樽甚奕論辨今古真時以子
弟侍立嘗為論唐正衙內殿之制詞科制誥檄書露布
之體以世之學者不暇致詳而獨許真為能學宋景定
末度宗即位尚書公以禮部郎官草百官表奏舊制請
聽政四表已上丞相賈魏公命增撰三道尚書公至幄
殿一揮而就先生酒酣嘗論先朝制作之盛真素習其

文因為默誦先生喜曰汝殆為吾家子弟也耶嗚呼先生已矣世無復有論斯事者矣真竊觀四明郡學先賢右祠尚書公在廢歷淳熙諸大老之列而他與焉蓋道德聞望有不可以勲名爵祿並者尚書公名滿天下傳及三世遺書舊藁先生與其兄嗣而承之非文獻之足徵者耶仰惟聖運文明士自一藝以上皆得與禮樂之盛使先生尚在不使居撰述之司勒成一代大典乎慨逝者之如斯悼來今之勿繼真所以欲圖其不朽者

實惓惓焉因述其平生出處大略求當代立言君子為之銘焉謹狀洪武十一年二月朔日鄉貢進士同郡契家子鄭真狀

亡兄金華府義烏縣儒學教諭鄭先生行狀

先生姓鄭氏諱駒千里其字也其先自吳興徙四明世祖諱鈞宋端平淳祐間與學碩材有聞于朝丞相鄭忠定魏王延致賓館仕為迪功郎衡州軍事推官再轉監平江府百萬西倉卒官曾祖諱登國子監進仕國子不

娶無嗣祖芳叔以工部尚書范公楷從孫來繼入元以
薦授慶元路儒學錄學者稱為蒙隱先生翰林侍講柳
公貫銘其墓父覺民處州路儒學教授學者稱為求我
先生翰林承旨雲林先生危素銘其墓祖妣蔣氏教授
生三子先生其長也生而娟好靜秀姿貌玉雪時淅東
閬帥趙公某與學錄公斯文之契麾節過家從容竟日
抱以示其母夫人母夫人置膝上華以色衣愛弄賞惜
期以遠器稍長先教授教以性理字訓大學中庸論孟

書易等書輒至成誦十歲餘遣入郡庠王先生寧孫叔
遠蔣先生宗簡敬之張先生用唐子西相繼訓導弟子
員先生得其緒餘科詔復行先教授俾專治詩經先生
服勤不輟自朱子集傳外若迂仲李氏東萊呂氏潛庵
輔氏新安胡氏集傳釋童子問等書裒集纂輯統宗會
元以為明白純正無出朱子吾不幸不生於二百年前
親在弟子之列而猶幸于二百年之後讀其書而尚
論其世也每形諸論議溫潤鎮密而用意精到天台陳

公廷言主為文會深表異之年二十時受大家聘幣為人師有顏司獄者其子與先生年相若願執子弟禮而不能得蓋先生學務平實而待人接物心平氣和人人羨慕敬愛之西遊吳中翰林張公逢原待為通家凡性理之微言之懿歷代典故之詳中朝文物之盛討論往復而先生之學為不可及矣既歸而學者爭欲禮致之慈溪葉賢仲規為義塾以教族人未成而卒遺言謂其子非鄭先生不可師先定其規約而為之首創好義

者有所興起嘗造淞闡不售嘆曰吾寧較得失于一旦
即修身律己以淑諸人斯亦可矣值時事日非講道山
林間未嘗跡公卿之門家事巨細一不經意淞東僉憲
戴公東臯薦為本郡學錄於是先生年四十餘矣後十
餘年際聖運肇興復以科目取士有司請就試先生力
辭繼用三年疊試又命大徵儒士縣大夫敦迫甚至先
生辭之益力會郡學訓導缺員郡通守以幣踵門先生
曰吾祖若父師表郡庠以經學淑後進多矣此豈不可

為耶就勉職座下以材藝薦成均者歲有其人朔望講
經反覆明暢郡守諦聽而竦敬焉象山堂試請為考官
取舍之公士論為服四明文獻之邦儒服為盛任府州
縣者多至二百餘人疲冗不勝任及姦賊得罪居其大
半於是在仕籍者以山林為安收害嫉妬相與牽挽而
出之而同郡楊侃由夔府上剡先生曰吾乃為險巧不
肖子所薦耶辭之二年會御史按臨浙江督促尤急先
生不得已去之吏部會楊侃以事敗繫秋官瘐死先生

曰果然累吾出處矣引老控辭吏部侍郎增城張公度
景彛曰先生才行久在識知所著經義考功置在高等
學所以為用先生乃不肯一出以為身榮耶不敢煩以
有司當授以近使教職幸勿讓先生遂領金華府義烏
縣儒學教諭過家上冢而去義烏故侍講黃公之里衣
冠禮樂遺風具存諸生受業訓以知行體用之說漸漬
成就如時雨之化踰年入貢禮部者凡三之一自縣長
及縉紳士大夫暨山林高道之士咸羨慕禮重以得人

為喜內相宋公自翰林歸里第先生兩造焉公待以賓
禮握手論議從容竟日且曰吾官翰林十年見天下學
官多矣老成典重先生莫尚焉傳以潛溪集復為誌先
妣蔣氏之墓其見知遇如此所寓扁曰西山艸堂一榻
坐忘嘗笑曰廣文官獨冷欲辭不可得矣聚春秋五傳
及諸經史溫繹舊聞誓以立言自見而先生年老多疾
志慮向衰飲食起居意忽忽不樂一日去之傳御史家
中風疾舁歸而絕大明洪武十一年五月一日也子翁

昇侍側無一錢以斂知縣事孔克源為買棺主簿

闕

及父老致贈賻諸生奠祭如禮以是月某日藁葬縣東
顏孝子墓山明年十月二十一日歸葬于鄞縣桃源鄉
先教授墓左先生于有元延祐七年庚申十一月初四
日距卒之日享年五十有九娶孫氏正父先生之女子
男二長即翁昇次同昇早夭女二長適王中傳厚齋尚
書公四世孫次許嫁吳某未行先生天性溫純氣貌充
偉樂天知命不以貧賤富貴為忻戚事親至孝得其歡

心先教授疾亟先生在達溪山中聞而亟歸先教授為之喜屬以遺言而逝先母蔣氏不疾而卒先生見其屬續人皆以為孝誠所致云在外覺心動歸平生用志古學自三代秦漢唐宋諸家固不涉獵而于文章正宗及玉海詞科十二體之中為有得以為世之為文者不過議論叙事兩端而貴於識體體制不立而別出新奇可乎或蹈襲成言支離骯髒將焉用哉論及史傳以為司馬資治通鑑專于紀事朱子綱目春秋目倣左氏因事

以明理自成一家其書帝在房陵用公在乾侯例識者
猶以天子不當下比諸侯而同郡人陳桎著續通鑑于
景炎祥興猶用之何也蓋宋至德祐二年三宮北上宗
社陵夷圖籍符璽盡去閩海亡魂崖山遺燼豈得與中
宗比哉此作史好奇之過也會朝廷修元史慨然論紀
載之法以為此當屬之名世大手後生晚進于司馬氏
子朱子書法未領其要迺欲執筆廁于其間耶所見大
槩如此至於詩律之精特其緒餘之一爾觀者目以臺

閤氣象非山林枯槁者所能晚年理明義精王先生叔
載以博洽名家以為士林凋瘵可寤語者惟先生一人
有所疑者諮以辨決焉他如酒樽碁奕古今圖畫彝器
辨別真偽用以致清趣云有文集若干卷藏于家惟吾
鄭氏以儒名家至先生累世矣雖不及顯榮于時登兩
制三字之選然獎成多士以為世用比之高爵重祿不
既多乎哉真以同母兄弟友于之篤四十餘年洪武壬
子以鄉貢計偕京師慟哭為別及典教臨淮先生在義

烏屨以書來曰吾老矣兄弟天涯寧復有相見日耶真時讀之不以為然而今其果然矣為言之效迺至是哉嗚呼痛矣夫昔明道先生程公歿其弟伊川狀其行表其墓者文潞公也東坡先生蘇公歿其弟黃門狀其行署其廟之神道者近者虞文靖公傳之宋史者歐陽文公也真之兄弟不敢竊比古人然曩倫之重萬代一日也況先生之問學行誼果有志于先烈者哉則夫華表之辭勒之金石以光昭泉壤者不有文潞公虞文靖歐

陽文公其人乎謹錄平生大槩及生歿歲月告諸當代
立言者

欽定四庫全書

卷四十二

榮陽外史集卷四十二

欽定四庫全書

榮陽外史集卷四十三

明 鄭真 撰

墓銘

鄭同昇墓甄銘

有序

洪武六年秋真以鄉貢進士典教臨淮家兄明學訓導
以書來曰同昇以六月三十日死矣以汝有叔姪之親
用以訃汝又曰是子氣性頗異常兒吾老且貧庶望其

底于成也今吾望絕矣柰之何真捧書慟哭再三四默
念同昇之生之病之死深有足悲而家兄之言尤不可
忘者因執筆論次其略云同昇姓鄭氏故慶元路儒學
錄蒙隱先生諱芳叔字德仲之曾孫處州路儒學教授
諱覺民字以道之孫今明州府儒學訓導諱駒字千里
之次子也母孫氏訓導與真為同母兄弟先教授在時
與同昇外祖正父先生俱以德行文章師表一鄉婚姻
之家為郡士大夫家稱重同昇之生姿貌玉雪在襁褓

中能伺人意先妣蔣氏深愛之起居坐卧嘗與之俱年
八歲出就外傳讀書琅然會真館授韓氏同昇亦就學
焉四書朱子集註杜少陵詩選讀之略徧授以詩易二
經能通大意作字道謹釋疑解義多可觀論語詩騷長
篇短製已漸就繩墨矣其居家也不好戲弄意有所忤
雖飢渴不輒飲食論事之是非曲直亦時有中者以是
一家之長皆稱之先教授即世同昇患鶴膝風經年而
愈迨先妣卒家難相仍同昇疾以復作卧枕席上挺挺

骨立項背拘攣展轉不能作氣痛不可忍常終夜有聲
其母撫視頃刻不倦諸母亦憐之間以針刺少緩值六
氣不齊寒熱復作疾益甚醫者用藥或溫以補或涼以
疏曾不一效計日數之殆更三歲去冬十二月真來京
師與同昇執手為別相顧各涕淚不自禁嗣是累以書
問其痊否噫同昇今不復見矣悲夫昔昌黎韓公祭兄
子老成有曰吾兄之盛德而天其嗣矣汝之純明宜世
其家者而不克蒙其澤矣一在天涯一在地之角斂

不得憑其棺窆不得臨其穴自今以往吾其無意於人世矣三復斯言未嘗不歎其悲且哀也嗚呼孰知去公數百載而真之於同昇其悲且哀有適相似而甚焉者乎同昇生於丁酉歲二月某日距今歲癸丑死時年十有七以某月某日葬於鄞縣桃源鄉西巖山先教授墓左真向嘗以春秋同盟之義字同昇曰彥盟而未著於人人茲特係以舊名銘之墓輒以慰其靈云天殤罹兮骨肉乖而父老矣其何以為懷也耶

故清河張處士墓誌銘

聖天子即位之三年龍集庚戌詔天下以明經科貢士
於是廣州府增城縣張度以書經就試廣東行省明年
徵詣京師再試吏部中選拜監察御史賜豸冠綺衣銀
束帶謝恩奉天殿下既就職奉命分守北京已而巡歷
中京繡衣所臨風采凜然間嘗以朔日展敬先聖廟下
浚儀趙某以癯老請見御史愴然有言曰度以非材備
員憲屬實先考處士教訓所及先考卒葬迨今有年而

墓上之銘未立先生嘗逮事前朝於書事為宜敢以不
朽請其固辭不獲則退而按狀論次其大略云處士姓
張氏名復禮即名為字禮庭其號也世家廣東番禺之
禮園社曾祖枵業儒弗仕精於易學祖一飛父彬甫兩
世克承其傳曾祖妣某氏祖妣麥氏母羅氏處士生而
凝重寡默無疾言遽色志行卓異不為流俗所移博學
善文嘗撫手澤慨然曰吾家易學之傳今三世矣雖不
資以取富貴所賴乎淑諸身以遺後人者其庶幾乎於

是窮探幽索深契玄理觀夫日月星辰之著風雨霜露之變晝夜冥晦之往來寒暑陰陽之代謝以之達諸辭象通於變占吉凶悔吝視為趨舍動靜起居罔弗以禮事父母以孝睦宗族以和待鄉黨以敬處事接物悉得其要先墓在禮園之南山由祖始葬洎處士考妣與伯父隣甫伯母蔡氏先後告終處士窆四穴安厝之展省封殖歲時不廢嗣守先訓篤意教子時科舉盛行以鄉落間鮮師儒挈家居廣城俾諸子肄業郡庠學既成矣

長子度為肇慶高要儒學教諭得祿以養凡六年處士
喜且慰曰吾家斯文一線之脈當不墜矣會兵甲繁興
撫時感事嘗鬱鬱不樂一日以疾不起郡境分據家難
殷憂度因奉喪避地增城之西有章山壠羣峯擁從盤
礴左右羅浮聳翠綿亘其前遂為處士墓時廣郡內附
矣處士生於有元大德五年辛丑九月二十四日卒於
至正二十一年辛丑四月二十三日享年六十有一以
大明洪武元年十月望日葬處士之配曰林氏至性純

行悉可儀法先處士卒今葬祔焉子四人長曰度即御史也次曰轉精楷書善大字次曰峻深詞律皆早世次曰熙好學而文未仕女一人適董桂榮孫男二人曰汝嘉曰吉祥女一人某惟故宋南渡以來經學之士視古為盛變故相仍文獻故家漸以湮微而處士乃能敬謹弗墜遭時孔棘弗克享其祿仕賣志以沒而有御史以為之子際今熙朝膺天子耳目之寄謹言弘議日開於上可謂難能也已嗚呼處士其有後乎是宜銘銘曰於

惟聖朝取士以經廣海東隅文獻可徵嗟嗟處士遁世
弗仕家學之傳以遺其子上膺薦書旅于明廷冠豸裁
裁赫馬寵榮追惟教忠貽謀罔失奚俟疏封式表先烈
章山巍巍宰木青青茲惟其藏以妥以寧明發寤懷
罔極恩報勒此銘詩永世克孝

元故四明范府君墓碣銘

府君諱源字仲淵姓范氏府君其追稱其先居汴宋建
炎間諱某號八府君者扈蹕南渡遂家于鄞生贈中散

大夫某中散生子五人長曰宣義郎某次曰工部尚書
楷由宣義至府君凡六世曾祖某祖某父謹字亨甫母
某氏初八府君以勤儉致富好義樂施人以慶門期之
傳及三世而尚書奮自科第入中書掌制晉登八座為
時名臣經筵講易啓沃帝心穆陵御製長春花詩親洒
宸翰以賜積官至文華閣學士贈少師嗣是代有顯者
宋社既墟不得有其世祿而府君之父亨甫翁移居奉
川老成聞望儀表鄉校有子三人長沂由紹興衢處三

府掾升集慶路上元縣典史仲澐老於農事不求聞達
府君其季子也府君生當盛平以才敏試吏羣有司積
勞升府史由明調越兩郡名守有若安圖公僧格實哩
公咸相器重薦司刑曹兩造在廷理斷曲直有冤者多
所平反人服至公越富民有殺人者府君司其牘富民
以厚利啗誘不為動卒寘于法會浙東僉憲圖們特穆
爾按臨于越羅織起獄事府君以他累罷歸句章從容
泉石間絕口不與世事俄一日得疾奄然而逝年七十

有四娶湯氏有婦道先卒子男三長懋歷定海慈溪臨
海縣吏以卒次與權定海長山場典史次士彬昌國正
監場典史女二長適奉川李本仁際今聖朝以儒士預
修元史授山西行省照磨次適定海王立禮孫男四道
同文同真同穎同孫女五如玉適慈溪陳懷德如瑛適
定海樓某如玖如璫如琚皆在幼府君性剛介處心仁
恕奉公以勤至忘寢食而清苦自持雖老於吏事莫致
顯榮而篤於教子見其成立有祿以養終其天年庶幾

無憾矣乎府君生於某年某月某日卒於至正二十

闕

年某月某日以某年某月某日與湯氏合葬慈溪德門
山之原從先兆云大明洪武之癸卯距府君葬凡十

闕

年矣真忝以鄉貢進士典教中都之臨淮府君次子與
權自顯上以書來言曰先人律身累行子若孫蒙福多

矣吾兄既早世而吾與弟士彬謫居在遠六年于茲南
望故山不得汎掃恐一旦溘先朝露家世源流後將無徵
子於范氏為宗盟敢以墓上銘文為請倘歸而刻諸石

先君猶不死也真受其言而深悲之慨念先大父蒙隱先生以范氏子來為鄭後與亨甫翁為同母兄弟義相友愛久不見必涕泣先教授求我先生踐修世好府君俾仲權來授詩經師友叔姪之誼莫尚焉先教授即世已久府君又不可作渺焉淮海與仲權相望一水間所以慰九泉之思承不朽之托者非真其誰也耶銘曰法從之家衣冠奕世命也不辰而試于吏吏本於儒不執不拘老而歸全式完其初善積于躬貽厥孫子窀穸之

藏永固勿圯

楊母黃夫人墓誌銘

大明洪武七年甲寅冬天台楊文會以嘗逮事先朝徵
入京師謁予史館以前鄉貢進士潘伯脩述其母夫人
行狀求銘墓石按狀夫人諱丑字集義姓黃氏其先自
宋工部尚書懋由金華徙居台之黃巖柔川里曾大父
希文承信郎長信宮幹辦公事官大父元泰太學上舍
生父荀龍登咸淳四年進士第調迪功郎安慶府宿松

縣尉母童氏夫人生於元至元丁丑十一月十一日天性聰慧幼年縣尉公授以內則等書多能成誦至孝經三才章言天之經地之義人之行意領心悟語兄弟曰孝如其重耶自是承順二親惟謹尤勤女紅縣尉公鍾愛之既長擇所宜歸得同里楊氏是為元衢州清獻書院山長載至之妻宋知奉化縣中甫之冢婦朝奉郎珪伯之孫女婦夫人歸楊氏年方十九舅姑已歿惟朝奉公大耋之年屹然為一門砥柱夫人衣禮服晨昏定

省凡十年躬治飲食製衣服隨所欲而進寒暑飢渴不失其時或有不悅色則怡聲下氣侍立問所意向俟復常然後退朝奉公每謂人曰孫婦甚善事我朝奉公即世夫人佐其夫山長奉養如禮山長歷任義烏寧海儒學教諭家事大小夫人實紀綱之年四十有七山長公先歿夫人不茹葷者三年諱日慟哭如初喪延名師教子有成立貧無食者賙之死無子者買棺葬之丁未歲歉發所積穀錢糶以濟鄉里既盡畢婚事遂清心禮佛

通其三昧一日感風疾遺訓諸子誦觀音普門品經怡然而逝至正乙未八月十三日也享年七十有九以明年丙申二月十六日葬於儒輿山之原與山長公合兆子男五長文昌元紹興路嵒縣尉次文治次文賢忠訓校尉紹興路總管府判官次文會由處州儒學教授陞將仕郎翰林國史院編修官次文淑庶出女四蔡廷芳王元掀黃果潘承栢其婿也孫男二十四人女十一人曾孫男二十八人女十人夫人令儀淑德名家懿範

承先裕後心實惓惓每以不逮事舅姑為恨於母家尤克致其厚割奩田之半以歸其兄初楊氏之族百數十人多罹至元丙子之難惟朝奉一門無恙山長公嘗作堂曰宜詵蓋有望也後子姓既多夫人構精廬山長公墓右命曰詵詵前左丞周公伯溫題其扁用以慰山長公之靈云予向居山中聞夫人以孝稱前參政金公原素嘗作楊孝婦三大字表異之今翰林編修朱右為立傳載其事甚備徵諸潘君之狀誠可信非誣系之以銘

可無媿詞矣銘曰女婦之賢莫重於孝懿惟夫人奉其先教既擇所從周旋敬恭宗事之托壹其初終七十餘年曰福而壽宜爾子孫永綏吉祐

蓬廬處士史公墓誌銘

上在位十有五年歲在壬戌夏六月詔前奉直大夫知北平府涿州事史行可進階中順大夫官山西道提刑按察司副使行可既拜命入謝侍朝三日面聞聖諭陞辭上道過臨淮訪真縣庠曰行可荷國厚恩實先公遺

教所及先公歿已有三十餘年而墓石未有刻文失今
不圖後將奚及子其執筆焉真退而論次如左公姓史
氏諱公珽字搢叟蓬廬處士其號也世居鄞之甬東八
世祖簡宋贈冀國公簡生贈太師越國公八行先生詔
詔生贈太師衛國公木木生贈太師齊國公東臯先生
漸漸生寶章大監鄞縣開國男彌恣公四世祖也曾祖
諱望之秘閣大理少卿祖諱儀卿從事郎監泰州丁溪
鹽場父遂伯入元隱德不耀鄉稱曰處士曾祖妣鄭氏

欽定四庫全書

卷四十三

丞相安晚魏王玄孫女特贈碩人祖妣鄭氏恭人母盧氏公
本端山先生諱彥伯季子以從弟遂伯無子來為之後
公生而秀爽詞氣溫恭早志於學通諸經子史而尤邃
於易延祐科詔行郡守舉堂課法公年未弱冠以書經
屢占前列庠序間名聲籍籍安晚曾孫習齋先生奕夫
奇之願敦世好妻之以女先生素以道學文章自任述
作論譔多俟公鑒定先生曰韓昌黎婿李漢而文譽益
振吾於措與庶幾哉公不自矜喜學日進而德以成家

居教授從之遊者每數十人諸生范樞趙景年貧不能
為禮公不以介意訓迪成立卒有聞時方承平故家子
弟多躋仕版公慨然嘆曰王者之民皞皞如也吾得為
王者之民足矣爵祿如彼何哉程先生端禮嘗薦為甬
東書院主奉即棄去兩試剡闈不售絕跡場屋用意古
作者慕陶靖節之為人追和其辭薄遊西州陶寫性情
自以為得江山之助名士大夫若黃公望柯九思俞鎮
與為神交詩酒從容俛仰今古論宋季臺閣典故朝野

人物疊疊終日至於國亡忠臣義士之死節者必慷慨
流涕兩遭大喪克盡禮制每春秋祀享忌日裸薦哀慕
之情見於顏面雖家道中微而田園猶足自給將芟柞整
輯為終老計而竟以疾終惜哉公生於元大德五年辛
丑十月十九日卒於至正八年戊子八月十六日享年
四十有七以是年十一月廿五日葬于陽堂鄉華輿之
先塋所著有蓬廬集若干卷易演義象如發揮三卷配鄭
氏克相其志子三人長景祖即行可有司奏戶籍時即

其字為名次晟祖次晏祖早夭女二人長適鄭必政次
幼亡孫男一必寵晟祖出也女二公性儉素而好施與
不倦廣平李堯民亡喪不舉公賙之累歲且為著哀辭
告其常往來者過錢塘西湖遇老人湯姓年七十餘蓋
德祐遺民知舊事甚悉公憫其孤貧解橐中半與之暨
歸無買舟費徒步不之悔處心仁厚多類此一日語其
子行可曰門戶之托實在汝等汝及我在屬志于學可
也未幾公即世行可年方十五佩服不忘與其弟晟祖

受業先君求我先生年幾二十大家間左要致之教子弟有師法際聖運肇開以詩經中洪武四年浙江秋試計偕京師授承事郎同知華州轉承務郎調樂安州同知升知涿州奉母以養人以為榮云真竊惟史氏自冀國積德累行歷八行至三世而樞密公才位登兩府自後世相王封父子叔姪焜耀前後天下之人歆艷而慕望之乃若獨善文華公以衛國之裔與公高大父大監同母嗣中散諱浣之後風節行誼世以甬東讀書種稱

之獨善之孫果齋蒙卿沂考亭正傳從子公瓊實學焉
公以本文系序之正學于公瑗而克嗣其承信乎文獻
足徵矣然以運去物改不得與世祿之盛豈非命哉乃
今行可踵美世科所至有聲上膺耳目之寄相門復興
其在茲乎真為史氏門婿視公為外伯父行且與行可
幼同研席親契之厚非一日矣斯文不朽之托可辭耶
銘曰烈烈四明有華相閥公生其間率履弗越天地蓬
盧我苗我畬仁義蓬盧我詩我書上下周流萬化一理

反身歸全孰呼起起有子象賢對敎明廷繡衣持斧服
茲寵榮慨思教言聲容如在錫類疏封時其有待華與
之原宰木光輝公侯復始福履其綏

墓表

故宋文林郎史公墓表

嗚呼是為故宋文林郎史公之墓宋有天下垂三百年
南渡以後台袞相繼者鄞史氏為盛子孫衆多榮爵寵
秩與其國家相為始終故文林郎史公其所謂世濟其

美者歟公諱世卿字景瞻世居鄞五世祖諱詒贈太師
越國公號八行先生曾祖諱淵朝奉郎知江陰軍妣姚
氏李氏並封恭人祖諱彌高贈奉直大夫妣陳氏贈恭
人考諱損之國子監發解進士妣陳氏公幼聰悟生七
年失父十六年失母從表兄陳習菴先生學習詩賦援
筆立就補入太學朝齋莫鹽視貴游紛華泊如也端平
二年公試八等嘉熙四年請國子監文解稱進士永國
公在相位簽書同知樞密院忠清公宅之欲以其子會

卿恩保奏回授淳祐九年觀文殿學士謙齋公宇之以
朝議大夫知處州公始以明堂恩奏補將仕郎十一年
銓選出官準告授迪功郎黃州麻城縣主簿兼酒稅賦
政平允吏民稱之寶祐二年改授平江府司戶參軍治
獄明刑為時稱首舉陞入格升朝奉郎直敷文閣兩浙
轉運司寄收庫兼提領戶部犒賞所錢庫引赦文度宗
登極恩轉修職郎幼主瀛國公登極恩轉從政郎明年
正月太皇太后有旨應在朝見任寄居特與進秩轉從

事郎未幾轉文林郎誥曰朕為萬邦之君誕膺天命士
自一命以上莫非王臣載考彝章咸增顯秩以昭明初
政以激勸賢勞王者無私已悉沾于大賚善人是聽宜
知報于湛恩公既拜命退歸清江里第宗社既墟絕口
不言仕進自號菊屏扁一室曰勤有讀書耕田優游自
適一日以疾不起公生于宋嘉定六年六月六日卒于
有元二十三年五月二十有三日享年七十有四以是
年九月庚寅葬於鄞縣楊堂鄉十里下水南畝之原娶

厲氏子男一巨伯女一

闕

適將仕郎楊嘉孫男六公順

公疎公翊公竑公竑女三

闕

公儀觀豐

偉言論疏爽奮然植立動有志操丞相忠獻衛王嘗欲立為長子待制公後王薨遂不果故樞密公觀文公特深念之理宗眷遇勲臣家當時以攀附致榮顯者不可勝紀而公謙卑自牧不以榮貴累心其過人遠矣世異事殊丘園肥遯而老成典刑藹然為故家範模孰不企而仰之某獲登公門距公之葬已五十餘年矣間嘗展敬

拜遺像使人興起而不已焉者今公之孫公竚以外舅之好且使晉拜墓下流涕言曰自吾祖若父至于今三世吾兄弟六人死者已過半矣而吾又無子吾祖之祀賴以不絕者其惟吾亡兄與吾弟之子矣吾懼後來者之無所徵也子盍為文以表之嗚呼孝子慈孫所以不忘其祖者如此然則光昭令德可終已耶是為表

元故洪處士墓表

元故洪處士既卒之十六年其次子實以嘗從事藩省

來居濠梁與真相遇敦叙世契愴然有言曰先人終歸
全所以貽吾二子者實拳拳焉吾兄以承宗之嫡志存
堂構而今老矣眇焉小子無所肖似而名在謫籍亦已
九年墓上之木拱矣而勿克以時致享孝之禮每自云
南望未嘗不為慟哭而流涕也先人之葬天台胡先生
世佐已銘其墓冀子復為一言表諸墓隧實幸不即死
異日獲得旋歸將與吾兄同盡其情焉真問而悲之因
為論次其略云處士諱夢良瑞卿其字也世家明之慈

溪大隱山五世祖師顏樂餘姚上林之風土而徙家焉
曾祖樟仕宋至湖南宣撫使祖子文父正之以方州試
待補入上庠釋褐授承直郎值宋社亡杜門求志遂不
復仕處士生而性質剛直氣色溫恭自幼失怙承母訓
讀古今書明理達務自處儉約而有濟人利物之心歲
丁未戊申大歉飢殍者衆處士捐已廩以食之鄉鄰貸
錫者悉焚其券人皆賢之或勸之仕則曰人生幾何而
以微名薄祿櫻其志慮也耶幸先世遺緒保守勿墜使

後人有所承藉足矣遂優游泉石間絕意世事年及耄
矣哀病日亟謂其二子曰吾資產雖薄足備衣衾周棺
槨不為無具有子有孫不為無後賦形以來歷四百二
十甲子不為無壽死亦奚憾俄一日奄然而逝生於至
元癸未十二月十九日卒于至正辛丑九月二十五日
享年七十有九以是年十有二月二十日葬于鄞縣通
遠鄉環邨錢輿之原娶方氏繼樓氏樓故參政鑰之後
處士樂其文獻遺俗遷郡城王墩而附近焉子男二長

炳元衢州路龍游縣儒學教諭次郎實也孫男四禧禋
禎禩初處士之卜葬也將窆穴霖雨流潦畚鍤既舉雲
破日出及啟殯風雪交作輦車登舟天條開霽薤歌前
導哭泣縞素襄事而歸既虞以祔微雨沾洒咸以處士
積善及其子孝感所致焉惟宋自南渡以來洪氏貴顯
者代不乏人鄱陽洪氏自忠宣公皓以忠節名天下傳
其三子适遵邁皆以詞學名科至宰執侍從天目洪氏自
內翰端明啓夔傳其二子勲燾亦以才名見知于世以

今處士家牒遍觀之宣撫公累官行事雖不槩見實與
鄱陽天目相望後先胡先生謂與鄱陽源同所出信矣
處士以前人遺緒隱居獨善隨所在而不失其傳臨終
遺言又能順受死生之正可不謂賢乎况乎有實以為
之子雖在異鄉而風雨霜露之恩無日或忘詩所謂威
儀孔時君子有孝子者于處士見之矣真忝以同里知
處士為詳序其平生大槩而傳之固不得而辭也是為
表

葬記

陳以通父葬記

同郡陳以通父既卒將葬其孤

闕

縗經踵門謂某曰

闕

等不孝罹禍先人今襄奉有期未及乞銘當代巨

公叙其生歿歲月大槩而納之幽敢以屬之真辭再三
不獲則退而為之記曰以通諱公享陳氏系出媯姓其
先廣平人宋時有以醫官入翰林者建炎間扈蹕南渡
定居于鄞曾祖諱後良祖諱瑞孫八元以季居禮貴贈

從事郎行宣政院都事嘗師事厚齋王先生得文章典故之傳著難經辨疑援据該洽識者稱之父諱居仁龐厚老成洞明經史治奇疾神愈後學尊之為先生以薦署昌國州醫學正不就再以教授薦命未下而卒前鄉貢進士淞河楊彛壯其行治母黃氏以通教授先生第四子也少有異質循導規矩嘗學于鄉先生紀十之暨其子文凱能為詩文而尤志于家學自靈樞素問難經及諸家奇方秘論鈎玄撮要如指諸掌日與諸兄侍教

授先生側參扣辨問教授氣嚴色莊不少假借以通益
自警飭年二十餘以善醫聞上而貴官富人下而閭巷
疏賤有以疾告必為治理風雨寒暑勿憚也所製藥必
澤土產及色味之精良者至于銖兩之等烹炮煉養之
度高下隨宜而不戾于古故藥無不善用無不效其售
諸人徃徃不計其直貧不能得錢者則周給恐後用是
聲譽隆洽能言者多為詩文以贊美之長編巨軸觀者
以為無媿詞云至正闕年藩省大臣上其能勅署江

淞行省醫學提舉以通以非其志不為就際今天朝仍舊制郡縣官醫二人以通雅為故郡張侯所知以本府提領薦諸淞江省行省報可有司捧檄至門以通辭避再三至敦迫不已黽勉就職未及一年得上氣疾以卒年四十有九嗚呼悲夫以通生於元闕年某月某

日卒于洪武四年六月某日以明年某月某日葬于鄞

縣五鄉碑之原娶何氏子四人長闕次闕先數月

卒次闕

次孫男二闕

女一惟四明以儒醫稱

者推陳氏為首以通既克承祖父之傳拳拳焉濟人利物而勿以爵祿為榮其於自處得矣然以名不可卒過才不能終已為之少出而死遽及之此固士大夫所深悲者也真辱在契家相知為深庸取其律身行己之大者叙而誌之以慰其嗣人云

閻學錄壙誌

先君姓閻氏諱寶奎字瑞卿世居奉化州忠義鄉之九峯曾祖諱安祖故宋朝奉郎新改差權發遣卽武軍事

兼管內勸農事妣

闕氏祖諱

闕

妣楊氏父諱

闕

妣

闕

氏兩世皆以儒行有名州庠先君生于

闕

年六

月廿五日癸巳幼聰悟長端謹厚重處事有法克廣先業從鄉先生南仲李公問學書史通大義至大庚戌始來郡城東山松崖謝公招為贅壻居數歲得城東廂一廛遂徙家焉先君性孝友二親色養備至連遭大喪顛祠追薦撫弟姊益篤于宗族尤盡恩意教子若孫必求名師祭祀婚嫁務盡其禮賓客相過從時飲酒賦詩以

為樂急難赴義恤貧恤寡名勢一不動念至正乙未江
南諸道行臺監察御史李公志以先君晦迹丘園薦諸
浙東元帥府署處州儒學錄先君不之就嘗曰九峰衣
冠故里吾不敢東忘也時往來其間得地一區溪嶂旁
遶遠列因累土植木竈穴為歸藏于是年既老矣不問
家事闢一樓雪菴李公嘗題其額曰懷安棲處其中不
越戶限者數年以至正二十一年三月二十八日卒于
正寢六十有九嗚呼悲哉娶謝氏先十年卒男二長恭

早卒次思敬海道都漕運萬戶令史女二長許嫁卒次
適同里李某以卒孫男一汝賢女二思敬不孝忍死將
以是年十一月廿三日甲申奉柩歸葬忠義鄉德星里
閩公稿之原與謝氏合兆日薄未暇乞銘當代鉅筆姑
誌其歲月大槩納哉闕孤哀子泣血謹識

滎陽外史集卷四十三

欽定四庫全書

滎陽外史集卷四十四

明鄭真撰

闕

榮陽外史集卷四十四